

職方典第三十四卷

順天府部紀事二

遼史太祖紀神冊二年三月太祖攻幽州節度使周德威以兵拒于居庸關之西

契丹志吳王遣使遺太祖以猛火油曰攻城以油然火焚樓櫓敵以水沃之火愈熾太祖大喜卽選騎二萬欲攻幽州后晒之曰豈有試油而攻一國乎因指帳前樹謂太祖曰此樹無皮可以生乎太祖曰不可后曰幽州城亦猶是耳吾但以三千騎伏其旁掠其四野使城中無食不過數旬城自困矣何必如此躁動輕舉萬一不勝爲中國笑吾部落亦解體矣太祖乃止

遼史太祖紀神冊六年十一月下古北口 太祖圍涿州有白兔緣壘而上是日破其郭

地理志太祖援石晉自潞州廻入幽州幸大悲閣指白衣觀音像曰我夢神人令送石郎爲中國帝卽此也因移木葉山建興王寺春秋告賽尊爲家神

太宗紀會同九年九月闔諸道兵于漁陽西

食貨志太宗以燕城北有市百物山俯命有司治其征

乾亨間燕京留守司請弛居庸關稅以通山西糴易

地理志每季春弋獵于延芳淀淀方數百里春時鵝鶩所集夏秋多菱芡國主春獵衛士皆衣墨綠各持連鎗鷹食刺鵝雉列水次相去五七步上風擊鼓驚鵝稍離水面國主親放海東青鵝擒之鵝墜恐鶻力不勝在列者以佩錐刺鵝急加其腦飼鶻得頭鵝者例賞銀絹國主皇族羣臣各有分地遼史本紀聖宗統和四年宋將曹彬米信北守拒馬河與于越休哥對壘南北列營長六七里五月戰于岐溝關大敗之追至拒馬河

遊幸表五年幸潞縣西放鵝擒鵝

統和六年四月幸延洪寺 十一年正月幸延芳淀

本紀統和十二年正月朔瀋陰鎮水漂溺三十餘村詔疏舊渠 十三年正月幸延芳淀 十

四年四月鑿大安山取劉守光所藏錢 十五年正月幸延芳淀

聖宗本紀統和十九年十月己亥南伐壬寅次于鹽溝

遼史列傳燕京留守蕭孝穆乞於巨馬河接宋境上置戍長巡邏

百官志開泰七年沿巨馬河宋界東西七百餘里特置戍長一員巡察

興宗本紀重熙十一年冬十二月幸延壽寺飯僧詔宋史觀擊鞠 十二月以宣獻皇后忌日上

與皇太后素服飯僧於憫忠寺 十二年正月如武清寨葦淀 二十三年冬十月以開泰寺

鑄銀佛像曲赦在京囚

松漠紀聞國少浮屠氏有趙崇德者爲燕都運末六十休致爲僧自爲大院請燕竹林寺慧日師住持約供衆僧三年費

嵩山集契丹主鴻基以白金數百兩鑄兩佛銘其背曰願後世生中國

遼史天祚帝紀乾統四年十月鳳凰見于渤海

天祚帝紀保大二年蕭翰破宋師于良鄉 二年春正月上出居庸關至鴛鴦灤十一月蕭德妃

五表千金求立秦王不許以勁兵守居庸及金兵臨關厓石自崩戍卒多壓死不戰而自潰 遼

高勳爲南京留守宋略地益津關勳擊敗之

燕北雜記遼俗每年正月一日以糯米炊餅用白羊髓和丸如拳大行宮寢帳內各散四十九丸戊

夜各於帳內窗中擲丸於外數偶動樂飲宴數奇令巫十有二人鳴鈴執箭繞帳歌呼帳內爆鹽鑪中燒地拍鼠謂之驚鬼居七日乃出

遼史遼俗立春婦人進春書刻青繒爲幟像龍御之或爲蟾蜍書幟曰宜春人日煎餅食庭中謂之薰天

燕北雜記正月十三日放契丹做賊三日如盜及十貫以上依法行遣

遼史二月一日爲中和節八月爲悉達太子生辰雕木爲像儀仗百戲導從循城爲樂

燕北雜記遼俗三月三日以木雕爲兔分兩朋走馬射之先中者勝負者下馬跪進勝者酒勝者於馬上接盞飲之

遼史夏至日謂之朝節婦人進綵扇以粉脂囊相贈八月八日遼俗屠白犬于寢帳前七步瘞之露其喙後七日中秋移寢帳于其上

燕北雜記遼俗九月九日打圍鬪射虎少者爲負輸重九一筵席射罷於地高處卓帳飲菊花酒出兔肝生切以鹿舌醬拌食之

遼史遼俗至日帝御天祥殿北南臣僚常服入朝依位賜坐契丹南面漢人北面分明行闕或五或七籌賜膳及茶若帝得闕臣僚進酒訖以次賜酒

使遼錄北人打圍一歲間各有處所五月釣魚海中于水底釣大魚二月三月放鶻號海東青打鴈四月五月打麋鹿六月七月於涼淀坐夏八月九月打虎豹之類自此至于歲終如南人趁時耕種也

職官分紀契丹於開寶七年涿州刺史耶律琮以書遣雄州孫全興願講好于朝廷八年遣使克沙骨慎思奉書來聘自是乃通使矣

太平治迹統類宋太宗謂宰相曰幽州四面平川無險固可恃難于控扼異時收復燕薊當于古北口以東據其要害不過三五處屯兵設堡自絕南牧矣宋琪對曰范陽是前代屯兵建節之地古北口及松亭關野狐門三路並立堡障至今古壘基堞猶存將來平定幽朔至于數處置戍可也截江網太宗既平太原遂觀范陽得汾晉幽薊之馬凡四萬二千餘匹

太平治迹統類太平興國四年六月車駕北征幸城西隅督諸將攻城命曹翰米信率兵屯東南隅

軍士掘蟹以獻翰謂諸將曰水物而陸居失其所也且多足慮救將至又蟹者解也其班師乎甲申上以幽州城踰旬不下遂詔班師

玉壺清話太宗征幽州曹翰爲東路豪塞總管善風角一夕角聲送風至帳翰促令環帶曰寇至之兆也未幾果然大敗寇兵於城下

塵史永熙旣下并州欲乘勝收復薊門咨於衆參知政事趙昌言對曰自此取幽并猶熱熬餅耳殿前都指揮使呼延贊爭曰書生之言不足盡信此餅難翻永熙竟趨幽燕卷甲而還卒如贊言

王氏聞見近錄太宗皇帝自并門乘勝直趨幽燕契丹甘心沙漠遯矣有赦例郎君於越者請得五千騎以嘗王師不成退處未晚從之乃騎持一幟由間道邀我歸路周環往來晝夜不絕帝疑救兵大至宵走定州

宋史本紀雍熙三年三月辛巳曹彬克涿州乙酉曹彬敗契丹于涿州南殺其相賀斯

東都事略雍熙三年詔曹彬將幽州行營前軍馬步水陸之師與潘美等北伐敗契丹於固安破涿州又與米信破契丹於新城戰於岐溝關我師敗績

宋史河渠志淳化四年春詔六宅使何承矩等督戍兵萬八千人自霸州界引滹沱水灌稻爲屯田用寶庫廩且爲備禦焉

宋史潘美傳太宗征范陽以美知幽州行府事及班師命兼三交都部署留屯以捍北邊三交西北三百里地名固軍其地險阻爲北邊咽喉美潛師襲之遂據有其地因積粟屯兵以守之自是北邊以寧

宋琪傳端拱初琪以舊相進位吏部尙書二年將討幽薊詔羣臣各言邊事琪疏上謂大舉精甲以事討除靈旗所指燕城必降但徑路所趨不無險隘必若取雄霸路直進未免更有陽城之圍蓋界河之北陂淀坦平北路行師非我所便況軍行不離於輜重賊來莫測其淺深欲望回轍西適山路令大軍會於易州循孤山之北漆水以西挾山而行援糧而進涉涿水並大房抵桑乾河出安祖砦則東瞰燕城裁及一舍此是周德威收燕之路自易水距此二百餘里並是沿山村墅連延溪澗相接採薪汲水我占上游東則林麓平岡非戎馬奔衝之地內排槍弩步隊實王師備禦之方而於山上列白幟以望之戎馬之來二十里外可悉數也從安祖砦西北有盧師神祠是桑乾出山之口東

及幽州四十餘里趙德君作鎮之時欲遏西衝鹵塹此水沿河次半有崖岸不可徑度其平處築城護之守以偏師此斷彼之右臂也仍慮步奚爲寇可分雄勇兵士三千人至青白軍以東山中防遏北是新州嬀川之間南出易州大路其桑乾河水屬燕城北隔遼西避而轉大軍如至城下於燕丹陵東北橫塹此水灌入高粱河高粱岸狹桑水必溢可以駐蹕寺東引入郊亭淀三五日瀰漫百餘里卽幽州隔在水南王師可於州北繫浮梁以通北路賊騎來援已隔水矣視此孤壘浹旬必克幽州管內洎山後八軍聞薊門不守必盡歸降蓋勢使然也然後國家命重臣以鎮之數恩澤以懷之奚霫部落當劉仁恭及其男守光之時皆刺面爲義兒服燕軍指使人馬疆土少劣於契丹自被脅從役屬以來常懷骨骸之恨渤海兵馬土地盛於奚帳雖勉事契丹俱懷殺主破國之怨其薊門洎山後雲朔等州沙陀吐渾元是割屬咸非叛黨此藩漢諸部之衆如將來王師討伐雖臨陣禽獲必貸其死命置署存撫使之懷恩但以罪契丹爲名如此則藩部之心願報私憾契丹小醜尅日殄平其奚霫渤海之國各選重望親嫡封冊爲王仍賜分器鼓旗軍服戈甲以優遣之必竭赤心永服皇化俟克平之後宣布守臣令於燕境及山後雲朔諸州厚給衣糧料錢別作禁軍名額召募三五

萬人教以騎射隸於本州此人生長塞垣諳練戎事乘機戰鬪一以當十兼得奚霫渤海以爲外臣乃守在四夷也然自阿保機時至於近日河朔戶口虜掠極多並在錦帳平盧亦邇柳城遼海編戶數十萬餘耕墾千里旣殄異類悉爲王民變其衣冠被以聲教願歸者俾復舊貫懷安者因而撫之申畫郊圻列爲州縣則前代所建松漠饒落等郡未爲開拓之盛也琪本燕人以故究知蕃部兵馬山川形勢

陳貫傳貫以刑部郎中直昭文館知相州嘗上形勢選將練兵論三篇大略言地有大害今北邊旣失古北之險然自威鹵城東距海三百里沮澤磽确所謂天設地造非敵所能輕入由威鹵西極狼山不百里地廣平利馳突此必爭之地凡爭地之利先居則佚後起則勞宜有以待之昔李漢超守瀛州契丹不敢視關南尺寸地今將帥大抵用恩澤進雖謹重可信卒與敵遇方略何從而出耶故敵勢益張兵折於外者二十年方國家收天下材勇以備禁旅賴廩給賜予而已恬於休息久不識戰可以衛京師不可以戍邊境請募土人隸本軍籍丁民爲府兵使北捍契丹西捍夏人敵之情僞地勢之險易彼皆素知可不戰而屈人之兵矣後以疾卒著兵略世頗稱之

宋史食貨志端拱二年大宅使何承矩請於順安砦西引易河築堤爲屯田旣而河朔連年大水承矩又言宜因積潦蓄爲陂塘大作稻田以足食會滄州臨津令閩人黃懋上書言河北州軍多陂塘引水溉田省功易就三五年間公私必大獲其利遂以承矩爲制置河北沿邊屯田使懋爲大理寺丞充判官發諸州鎮兵一萬八千人給其役於雄莫霸州平戎順安等軍興賑六百里置斗門引淀水灌溉初年種稻值霜不成懋以晚稻九月熟河北霜早而地氣遲江東早稻七月卽熟取其種課令種之是歲八月稻熟初承矩建議沮之者頗衆旣種稻不成羣議愈甚至是承矩載稻穗數車遣吏送闕下議者乃息而莞蒲蜃蛤之饒民賴其利

宋史儒林傳胡旦上平燕議曰幽州在北門之外天時地利人事皆在可伐歲之所臨其地受福今年初秋至六年鎮在燕分從今年爲備至來春興師北兵過春夏則施裘皮屨羊弓塞馬不爲用而中原士卒素不能寒往北逢暄筋力勇健以勇健之士驅不用之敵乘福慶之時討災殃之城成功立事在於此矣幽州之北皆是山谷通人馬者不過十處苟塞斷山路餘寇在燕與大軍相持遷延其時以度春夏寇不能熱有退無前逆壘不足平猾寇不足殄也

宋史列傳楊應詢知霸州塘灤之間地沮洳水潦易集居人浮板以濟應詢增隄防爲長衢濬其旁以泄流民利賴之

萬姓統譜丁罕潁州人淳化中知霸州河溢壞城壘罕以私錢募築民咸德之

畫墁錄契丹待南使樂列三百餘人舞者更無回旋止於頓挫伸縮手足而已

淥水亭雜識遼曲宴宋使酒一行威箴起歌酒三行手伎入酒四行琵琶獨彈然後食入雜劇進繼以吹笙彈箏歌擊架樂角觥

何承矩傳承矩知雄州咸平二年適有詔聽邊民越拒馬河塞北市承矩上言曰緣邊戰懼司自洶河至泥姑海口屈曲九百餘里此天險也太宗置砦一十六鋪百二十五廷臣十一人戍卒三千餘都舟百艘往來巡警以屏姦詐則緩急之備大爲要害今聽公私貿易則人馬交渡深非便宜且砦鋪皆爲虛設矣疏奏卽停前詔

五年三月西京左藏庫使舒知白請於泥姑海口復置海作務造舟令民入海捕魚因偵平州機事異日王師征討亦可由此進兵以分敵勢先是置船務以近海之民與遼人往還遼人汎舟直入千乘縣疑有鄉導之者故廢務至是令轉運使條上利害旣而以

爲非便罷之

馮拯傳拯遷尙書工部侍郎簽書樞密院事賜手札訪邊事拯謂備邊之要不扼險以制敵之衝未易勝也若於保州威虜間依徐鮑河爲陣其形勢可取勝前歲王顯達詔不趨要地契丹初壓境王師未行而契丹騎已入鈔賴霖雨乃遁去比王超奏敵已去而東路奏敵方來旣聚軍中山以救望都而兵困糧匱將臣陷歿幾盡超等僅以身免今防秋宜於唐河增屯兵至六萬控定武之北爲大陣邢州置都總管爲中陣天雄軍置鈐轄爲後陣罷莫州狼山兩路兵從之

霸州志宋真宗咸平五年春二月霸州大水傷害民田

乾興六年霸州大水

東都事略宋真宗崩仁宗遣使告哀于遼主遼主集蕃漢臣舉哀令燕京懋忠寺置真宗靈御建道場百日

霸州志仁宗嘉祐二年二月霸州地震夏四月幽州地大震壞城郭壓死者數萬人

永清縣志仁宗嘉祐二年四月地大震壞城郭壓死數百人

宋史章頻使契丹至紫濛館卒契丹遣內侍就館奠祭命接伴副使護其喪以錦車駕橐駝載至中京又具鼓吹羽葆吏士持甲兵衛送至白溝

夢溪筆談章頻使遼死遼無棺襯至范陽方就殮後遼人常造數漆棺以銀飾之使人入境則載以隨行

東都事略劉敞奉使契丹博聞彊記素知山川道里契丹自古北至柳河廻曲百餘里敞問曰自松亭趨柳河其徑不數日可至中京何不道彼而道此契丹不虞敞知相顧驚媿曰誠如公言自通好以來置驛如此不敢易也 順州山中有異獸如馬而食虎豹契丹不知其名以問劉敞敞曰此所謂駿也爲言其形狀聲音皆如所見人歎其博物

辛齋詩話蘇子由賀遼生辰既至國人問大蘇學士安否子由涿州寄詩誰將家譜到燕都識底人問大蘇莫把聲名動蠻貊恐妨他日臥江湖子瞻得詩次韻云甌羆年來亦甚都時聞鵠舌問三蘇那知老病渾無用欲君向王乞鏡湖

夢溪筆談往歲大宅使何承矩議因陂澤之地瀦水爲塞欲自相度恐其謀泄日會僚佐泛船置酒

賞蓼花作蓼花遊數十篇因命座客屬和畫以爲圖傳至京師人莫喻其意自此始壅諸淀慶曆中
內侍湯懷敏復踵爲之至熙寧中又開徐村柳莊等樂於是自保州西北沉遠樂東盡滄洲泛枯海
幾八百里悉爲淤濶其闊處有及六七十里者至今爲藩籬而澱淤之處皆變斥鹵爲美田而魚蟹
菰蒲之利人亦賴之

宋史列傳宣和二年旣得燕山趙良嗣言頃在北國與燕中豪士劉範李爽及族兄柔吉三人結義
同心欲拔幽薊歸朝瀝酒於北極祠下祈天爲約

方輿紀要范村在州西南宋宣和四年童貫伐遼至高陽關遣种師道總東路兵趨白溝辛興宗總
西路兵趨范村旣而興宗至范村爲遼人所敗

宋史徽宗本紀宣和四年春正月癸酉金人破遼中京遼主北走三月丙子遼人立燕王淳爲帝金
人來約夾攻命童貫爲河北河東路宣撫使屯兵於邊以應之且招諭幽燕五月乙亥以蔡攸爲河
北河東宣撫副使庚辰以常德軍節度使譚稹爲太尉童貫至雄州令都統制种師道等分道進兵
癸未遼人擊敗前軍統制楊可世于蘭溝旬內戍楊可世與遼將蕭幹戰于白溝敗績丁亥辛興宗

敗于范村六月己丑种師道退保雄州遼人追擊至城下帝聞兵敗懼甚遂詔班師壬寅以王黼爲少師是月遼燕王淳死蕭幹等立其妻蕭氏秋七月壬午王黼以耶律淳死復令童貫蔡攸治兵以河陽三城節度使劉延慶爲都統制甲申种師道責授右衛將軍致仕和誅散官安置九月戊午朝散郎宋昭上書諫北伐王黼大惡之詔除名勒停廣南編管己未金人遣徒孤且烏歇等來議師期甲戌遣趙良嗣報聘於金國己卯遼將郭藥師等以涿易二州來降冬十月庚寅改燕京爲燕山府涿易八州並賜名癸巳劉延慶與郭藥師等統兵出雄州戊戌曲赦所復州縣己亥耶律淳妻蕭氏上表稱臣納款甲辰師次涿州己酉郭藥師與高世宣楊可世等襲燕蕭幹以兵入援戰于城中藥師等屢敗皆棄馬縋城而出死傷過半癸丑以蔡攸爲少傅判燕山府甲寅劉延慶自蘆溝河燒營夜遁衆軍遂潰蕭幹追至涿水上乃還十一月戊寅金人遣李靖等來許山前六州十二月丁亥郭藥師敗蕭幹于永清縣戊子遣趙良嗣報聘于金庚寅以郭藥師爲武泰軍節度使辛卯金人入燕蕭氏出奔壬辰使來獻捷丙申貶劉延慶爲率府率安置筠州 五年春正月戊午金人遣李靖來議所許六州代租錢己未遣趙良嗣報聘求西京等州辛酉以王安中爲慶遠軍節度使河北河

東燕山府路宣撫使知燕山府丙戌金人以議未合斷橋梁焚次會夏四月癸巳金人遣楊璞以誓書及燕京涿易檀順景薊州來歸庚子童貫蔡攸入燕時燕之職官富民金帛子女先爲金人盡掠而去童貫奏撫定燕城庚戌曲赦河北河東燕雲路是日班師五月以收復燕雲賜王黼玉帶以王黼爲太傅鄧居中爲太保是月金人許朔武蔚三州金主阿骨打殂弟吳乞買立六月乙酉郭藥師加檢校少傅丙戌遼人張覺以平州來附秋七月起復譚稹爲河北河東燕山府路宣撫使八月辛丑命王安中作復燕雲碑是月蕭幹破景州薊州寇掠燕山府郭藥師敗之幹尋爲其下所殺傳首京師十一月金人取平州

宋史紀事本末政和元年九月童貫謂遼司圖因請使遼以覘之乃以鄧允中充賀遼主生辰使而以貫副之或言以宦官爲上介國無人乎帝曰契丹聞貫破羌故欲見之因使覘其國策之善者也遂行冬十月童貫以遼李良嗣來命爲祕書丞賜姓趙燕人馬植本遼大族仕至光祿卿行汚而內亂不齒于人童貫使遼道蘆溝植夜見其侍史自言有滅燕之策因得見貫貫與語大奇之載與俱歸易姓名曰李良嗣薦諸朝植卽獻策曰女真恨遼人切骨而天祚荒淫失道本朝若自登萊涉海